



Pou Piblikasyon Imedya: 14/03/2023

GOUVÈNÈ KATHY HOCHUL

## GOUVÈNÈ HOCHUL BAY MIZAJOU SOU VAN NÒDÈS K AP AFEKTE REJYON NÒ NEW YORK LA

*Depi lendi nan aswè, kèk zòn nan Rejyon Kapital la ak Rejyon Mid-Hudson te resevwa ant yon pye ak yon pye edmi nèj, North Country te eksperimante prèske de pye nèj ak to chit nèj maksimòm nan sis pouz pa èdtan; plis pase 85,000 blakawout rete atravè Eta a ak pifò enpak nan Rejyon Kapital la*

*Konbinezon rafal van madi nan aswè ak lòt pye nèj yo prevwa jiska mèkredi maten kapab debouche sou plis blakawout*

*Yo leve tout restriksyon trelè traktè vid yo apati madi apremidi*

*Eta dijans rete anvigè pou Konte ki afekte yo nan plizyè rejyon kòm lòt nèj ak rafal van pou pwodui kondisyon vwayaj danje jiska mèkredi maten; Gouvènè Hochul konseye pa fè vwayaj ki pa nesesè nan rejyon ki afekte yo*

Jodi a, Gouvènè Kathy Hochul te bay Nouyòkè yo mizajou sou van nòdès ki te jete gwo nèj lannwit lan nan plizyè rejyon nan nò eta a epi li prevwa kontinye afekte plizyè rejyon jiska mèkredi paske plis nèj ak rafal van pral afekte kondisyon vwayaj yo madi. Kèk pati nan North Country te eksperimante prèske de pye nèj ak to chit nèj maksimòm nan sis pouz pa èdtan, kèk pati nan Rejyon Kapital la te resevwa yon pye edmi nèj, epi rejyon Mid-Hudson ak rejyon Southern Tier yo te resevwa plis pase yon pye nèj depi lendi swa. Gwo nèj imid prevwa kontinye ak rafal van jiska 72 kilomèt alè madi aprèmidi ki pral ogmante chans pou gen blakawout. Yo prevwa rejyon ki afekte yo ap resevwa jiska yon pye nèj anplis nan mèkredi maten.

"Jan sa te prevwa a, plizyè rejyon ki gen eksperyans ant yon pye ak de pye nèj lannwit lan ak kondisyon yo pral kontinye danjere pou vwayaj pandan tout aswè nan madi"; **Gouvènè Hochul te deklare.** "Ekip mwen an an kontak konstan ak ofisyèl lokal yo epi Gad Nasional la pare pou ede ak nenpòt repons pou ijans ki nesesè pandan de jou k ap vini yo paske blakawout yo rete yon enkyetid."

Apati 2 p.m. madi, te gen apeprè 87,000 blakawout nan tout eta a kòm konsekans tanpèt la, ak majorite blakawout yo ki te afekte konte yo nan Rejyon Kapital la.

Apati 2 p.m. madi, Otorite Twotwa (Thruway Authority) New York la, Lapolis Eta New York ak Depatman Transpò Eta New York te leve tout restriksyon ki te fèt anvan yo sou trelè traktè tandem ak trelè traktè ki vid yo ki te kòmanse lendi nan aswè.

Sant Operasyon Ijans Eta a te aktive lendi maten pou kowòdone plis repons Eta a nan evènman move tan an. Lendi nan aswè, anvan nòdès la, Gouvènè Hochul te deklare yon Eta Ijans pou konte yo nan pati lès eta a, nan nò Konte Westchester. Gouvènè Hochul te aktive Gad Nasyonal New York la tou, ki te mobilize nan lendi pou ede repons Eta a nan Rejyon Kapital la ak Rejyon Mid-Hudson. Gen plis pase 100 pèsonèl ak 20 machin ki an atant pou ede ak misyon repons pou ijans yo.

**Komisè Divizyon Sekirite Teritwa ak Sèvis pou Ijans Eta New York la, Jackie Bray, te deklare**, "Tanpèt ivènal sa a déjà jete prèske de pye nèj nan kèk rejyon nan lès eta a, nan nò Konte Westchester, ak gwo nèj imid ki lakòz blakawout. Pandan efò restorasyon blakawout ak efò pou retire nèj la ap kontinye, tanpri tcheke sou vwazen ou yo ak moun ou renmen yo pou asire ke yo ap reziste kont tanpèt la san danje."

Plizyè avètisman ak konsèy sou tanpèt ivè an vigè pou pati lès Eta New York, nò Vil New York. Yo ka bay lòt avètisman ak/oswa avi. Pou ou kapab jwenn yon lis sou avètisman meteyowolojik yo nan zòn ou an, vizite [sit entènèt](#) Sèvis Meteyowolojik Nasyonal zòn ou an.

### **Konsèy sekirite**

#### **Vwayaj**

Men kèk nan konsèy ki pi enpòtan pou woule ansekirite:

- Pa kondui, sof si sa nesesè.
- Si ou dwe vwayaje, asire ou ke otomobil ou gen materyèl pou siviv tankou lenn, yon pèl, flash ak pil anplis, rad cho anplis, yon pè chèn pou kawotchou, kab boustè pou batri, manje ki bay enèji rapid ak rad ki gen koulè klere pou sèvi kòm drapo detrè.
- Si ou gen telefòn selilè osa lòt aparèy komunikasyon tankou yon wòki tòki disponib pou ou sèvi, kenbe batri a chaje epi kenbe l'avè ou tout lè ou ap vwayaje. Si ou ta vin bloke, ou ap kapab rele pou mande èd, enfòme sekouris yo sou kote ou ye.
- Prensipal kòz lanmò ak blesi pandan tanpèt ivè se aksidan transpò. Anvan ou chita dèyè volan, pa blye retire glas ak nèj ki sou machin ou an; bon vizyon se sekrè kondui byen. Planifye arè ou yo epi kite plis distans ant machin yo. Pote plis atansyon epi sonje pil nèj yo ka maske timoun ki pi piti yo. Toujou koresponn vitès ou selon kondisyon wout la epi selon meteyowolojik.
- Li enpòtan pou chofè ki sou tout wout yo konnen vitès chasnèj yo se 56 kilomèt alè, sa ki nan anpil ka pi ba pase limit vitès ki make a, pou yo ka garanti sèl yo simen an rete nan vwa sikilasyon yo epi pa dispèse andeyò wout yo. Anpil fwa sou otowout ant eta yo, chasnèj yo opere kòtakòt, kòm se fason ki pi efikas epi ki ofri plis garanti pou netwaye plizyè vwa yon sèl kou.

- Chofè machin ak pyeton dwe sonje chofè chasnèj yo ka wè devan yo sou yon distans limite, epi gwo sèvis ak pwa chasnèj yo ka fè l difisil pou manevre epi frennen touswit. Nèj chasnèj la ap soufle dèyè li ka diminye vizibilite anpil oubyen kreye yon vwal blan. Chofè machin yo pa ta dwe eseye double chasnèj yo, ni swiv yo twò pre. Kote ki gen plis sekirite pou chofè machin yo woule se lwen dèyè chasnèj yo, kote wout la klè epi gen sèl sou li. Pa janm eseye pase sou yon chasnèj pandan l ap fonksyone.

### **Blakawout yo**

- Tcheke konpayi sèvis publik ou a pou ou ka konnen orè reparasyon nan zòn nan.
- Etenn oswa deploge limyè ak aparèy menaje pou ou ka evite yon sichaj kouran lè yo repare sèvis la: kite yon limyè limen pou endike lè yo te retabli kouran.
- Si chalè a ale pandan yon tanpèt ivènal, kenbe kay la cho lè w fèmen chanm ou pa bezwen yo.

### **Rapòte yon blakawout**

- Central Hudson: 800-527-2714
- Con Edison: 800-752-6633
- National Grid: 800-867-5222
- NYSEG: 800-572-1131
- O&R: 877-434-4100
- PSEG-LI: 800-490-0075
- RG&E: 800-743-1701

### **Sekirite pou Chofaj**

- Sèvi ak sous chalè altènatif ki an sekirite sèlman tankou yon chemine, ti recho a bwa oswa a chabon ki byen ayere oswa aparèy chofaj pòtab.
- Lè w ap itilize sous chalè altènatif tankou yon chemine, recho a bwa, elatriye, toujou asire w ke ou gen bon vantilasyon. Toujou Swiv enstwiksyon fabrikan yo.
- Kenbe rido, sèvyèt ak manchon pwoteksyon yo lwen sifas cho.
- Gen yon ekstenktè ak detektè lafimen epi asire w yo fonksyone.
- Si w itilize aparèy chofaj ki mache ak kewozèn pou konplete gaz chofaj regilye w la, oswa kòm yon sous chalè ijans, swiv konsèy sekirite sa yo:
  - Swiv enstwiksyon fabrikan yo.
  - Sèvi ak gaz ki kòrèk la sèlman pou inite w la.
  - Remete konbistib deyò sèlman epi lè inite a frèt sèlman.
  - Kenbe aparèy chofaj nan yon distans omwen twa pye ak mèb yo lòt eleman konbistib yo.
  - Lè w ap itilize aparèy chofaj la, sèvi ak pwoteksyon kont dife epi vantile byen.

Pou plis konsèy sekirite sou lvè a, vizite <https://dhses.ny.gov/safety>.

Pou tout bezwen sèvis ki pa ijans anvan, pandan oswa apre yon tanpèt nan Eta New York, rele 211 oswa vizite [211nys.org](http://211nys.org).

## **Enfòmasyon sou Divizyon Sekirite Teritwa ak Sèvis pou Ijans**

Divizyon Sekirite Teritwa ak Sèvis pou Ijans yo ofri direksyon, kowòdonasyon ak soutyen pou anpeche, pwoteje kont, prepare pou, reponn a, rekipere apre, epi diminye katastwòf ak lòt ijans. Pou w jwenn plis enfòmasyon, vizite DHSES sou [Facebook](#), sou [Twitter](#) oswa vizite [dhes.ny.gov](http://dhes.ny.gov).

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418

[ANILE ENSKRIPSYON OU](#)